

武夷新集

卷

陸

武夷新集

卷一

陸

楊大年先生武夷新集卷之十七

邗關李 繡文素甫

鍾秀李葆貞守一甫全較

武林龔五謨華茂甫

表狀六

代僕射李相公承天節進經疏狀

右臣伏以河清九曲爰屬於休辰節紀千秋式遵於
故事富壽之祝臣子攸同况臣本乏器能出於幸會

望苑蚤叅於賓護台司旋預於弼諧享厚祿之萬鍾
奉禁庭之三接在具瞻之地無補於袞章荷洪覆之
恩免傾於鼎餗徒懷殞越莫報生成幸逢載誕之祥
願益無疆之算竊以大雄之教實爲衆善之因輒就
紺園式陳香供命五天之開士誦三藏之玄言六時
之梵唄精嚴八部之龍神護衛奉焚修於西竺用集
勝緣仰峻極於南山克資介祉拂石永延於浩劫傾
葵庶竭於下誠臣無任

代人次對奏狀

右臣次當轉對理合上言輒有見聞不敢緘默臣竊以太祖皇帝建隆年中曾降明詔聿修墜典咸秩無文以前王之功及生民遺廟之存於地志蕪廢者新其營構頽侈者俾之繕完乃至封樹以增崇固亦樵蘇而申禁使吉蠲之薦肅奉於常儀昭格之靈允懷於至德暨五嶽四瀆視三公諸侯興雲雨以利人奠坤元以載物並增嚴於棟宇用祇事於神祇當時樹

立豐碑以紀成績赴告青史式煥大猷歷今古以遐
觀真帝王之能事也臣前知河陽嶺祠濟瀆舊制長
吏每月朔薦獻必示躬親尋以爲煩祗令春秋亨奠
祭不欲數雅合禮經神實依人式資宗奉臣竊見朝
廷所脩廟宇剏葺斯久寒暑載離或梁木摧頽或屋
瓦滲漏漸成隳壞有爽精虔州郡雖欲舉行動須申
報俟符牒之往復必歲月之推遷臣欲乞特降勅旨
應前代帝王及嶽瀆祠廟自今後本處長吏二時奉

祠卽令檢校或有疎損便許葺修仍破省錢不須申
覆如此則國之大事在祀典以惟寅神享克誠亦陰
騭之昭報于犯旒展

代司空相公謝撫問狀

右臣昨日晚李沆等到臣私第奉傳聖旨以臣所患
令安心將治中書無事者處弼諧之任曾乏於謀猷
乖攝養之方自生於疾疢蓬華適居於假告冤旒仍
示於記憐特令當國之臣曲諭如綸之音慰安彌極

跼蹐靡遑蓋念臣本出諸生素無遠略幸以遭逢景
運際會先朝但持孤直之心獲玷具瞻之地跛鼃安
能於致遠短綆非可以汲深袞章莫効於彌縫鼎實
每虞於傾覆爰從策免復預疇咨雖竭肺腑曷裨塵
露終荷保全之惠繆升師長之崇皇帝陛下恭已奉
先虛懷求舊式汙揆路再冠台司比三八於承明殊
非光寵享萬錢於黃閣尤負覲慙宵衣豈減於憂勤
尸祿唯甘於嘲誚果貽瞰室遂致卧漳瞻八彩之眉

暫違堯陛賜十全之藥便降秦醫命星使以宣傳若
天顏之咫尺荷照臨之所及誠殞越以難勝敢謂特
遣輔臣同過陋巷備形問訊益示溫存教以安心俾
達農皇之養命諭之無事益慮孔明之傷神竊佩訓
詞仰銜睿眷頓祛沈痼丹九轉以何功誓報生成身
一毛而爲喻感恩之至泄涕無從臣無任

代侍講邢侍郎陳乞狀

右臣伏有懇誠貯於肝膈蓋屬禋燔之慶方覃渙汗

之恩冒昧上陳怔忡自失竊念臣有亡兄某早承義
訓少習文儒肄業膠庠服勤簡素頗有詞藻見推輩
流俯隣壯室之年未及命鄉之薦忽嬰疾疹遽至淪
亡臣亡妻某氏是臣二親在堂爲臣聘娶親執箕帚
逮事舅姑躬調滑甘奉養晨夕而臣未升朝籍臣妻
已擗泉塗靡及湯沐之封徒切糟糠之感今者郊丘
布澤幽顯懷仁臣不勝同氣之親痛深終鮮勉思齊
體之義情極悼亡罔避鈇鉞之誅輒干旒冕之聽伏

望皇帝陛下俯矜懇悃特霈寵章俾臣兄沾贈典之
微光生告第而臣妻蒙追封之命恩洽漏泉儻玄造
之曲成乃微願之永畢誓傾勤瘁以補遭逢

代宰相謝春社日賜御筵狀

右臣今日中使其至中書奉傳聖旨賜臣等御筵者
候靈星而置祠將興農作擇元日而命社爰舉國章
和羹方媿於素餐推食遽蒙於飫賜此蓋皇帝陛下
率遵時令寅奉天時道協建中仁深逮下屬陽春之

嘉節申宴樂於近司飛觴俾極於醺酣折俎更均於
慈惠歡呼飽德唯驚饕腹之屬厭跼踏畏威但仰龍
顏之咫尺共荷雲天之施益堅金石之誠臣等

云云

代宰相謝賜御製社日詩狀

右臣今日中使某至中書奉宣聖旨賜臣等御製社
日詩若干首令依韻和來者命社之辰聿當於春仲
變風之什獲覩於天章方蒙式宴之私忽奉言詩之
賜此蓋皇帝陛下思探繫表道合帝先宣雅曲於南

薰阜財解慍統乾文於東壁懸象著明屬品物之載
陽矧穆清之多暇爰紆睿思成是永歌居然治世之
音至矣聖人之作雲漢但光於凡目已覩曷繼於正
聲徒忘味於齊庭更驚魂於葉縣諒嗟歎之不足實
慶幸以同深臣等

云云

代司空相公寒食日謝賜御筵狀

右臣今日中使至奉宣聖旨就臣私第賜御筵者荆
楚歲時早傳於令節太原風俗爰舉於舊章方休澣

於私門忽頒宣於公宴此蓋皇帝陛下嘉天時之大
順念春物之載陽適因禁火之辰時示需雲之澤供
帳旣光於顏巷分甘仍出於堯樽華門迴長者之車
鼈腹飫太官之膳樂以侑食固肉味之都忘酒乃合
歡且羽觴之無算感德唯期於醉飽省躬更誓於糜
捐

代司空相公乞免賻贈狀

右臣今日中使某至臣私第奉宣聖旨以臣第幾男

某天殤特賜某物者晉相萬錢方致懸貍之訕童烏
九歲俄纏舐犢之悲年未及於成人禍良由於瞰室
敢謂恩加贈禭禮越彝倫況下殤之服紀素輕而宰
司之俸入殊厚望周之費固不至於慮居賻布之儀
乃深爲於躡等雖天慈之所及實公議以是憂豈惟
增謫於素餐更慮害盈於陰隲伏望皇帝陛下俯矜
忝冒曲示保全察茲跼地之誠恕以扣闥之僭特令
停寢用息怔忡干犯宸嚴期於得請

云云

代宰相謝新印道德經狀

右臣等昨日伏蒙聖慈各賜臣等新印道德經并釋
文各一部者伯陽立言首天地而稱四大馬遷約史
先黃老而後六經是開衆妙之門足助無爲之化恭
惟皇帝陛下功侔亭育德合希夷清明在躬蓋凝神
於姑射慈倫爲寶爰躋俗於華胥稽古訓以惟精訪
遺編而大備乃復欽崇妙道紬繹微言以爲柱下史
之書允爲教父河上公之注未洞玄關武因唐室之

討論早在虞庠而流布歲時寢遠頗多魚魯之譌方
策維新益出絲綸之旨已成功於刊刻忽命使以頒
宣臣等徒慶逢時俱慙昧道心希漢相但清淨以爲
師學謝蜀嚴豈指歸之能測惟荷記憐之造彌堅報
效之誠

進洞霄宮碑狀

右臣昨奉勅令臣撰亳州洞霄宮碑文進呈者聞命
魂驚抽毫思輒牽罄駑拙綿歷旬時竊以玄元誕育